

曾忠襄公書札

曾忠襄公書札二十二卷

長沙蕭榮爵編輯

衡山李蔚然

湘鄉彭熙文

湘鄉葛楚珍

善化羅玉藻

長沙劉啟蕃

湘陰李長俊參校

零陵

蔣子楷繕

許寅軒刊

曾忠襄公書札

卷之一目錄

與惲次山中丞

與劉用賓先生

與彭雪琴

與許仙屏

與李黼堂觀察

與蕭浚川方伯

致多理堂都護

復彭雪琴

與多理堂都護

復舒輔廷都護

致劉馨室

復舒輔廷都護

復李希庵

復李希庵

與李希庵

與李小泉

與蔡荷亭

與鄒嶧峰

與賴古愚

與李希庵

與李希庵

與李希庵

與多理堂都護

與楊厚庵

與張伴山

致黃冠北

致蕭浚川方伯

致毛寄雲

致李雨蒼

復舒輔廷都護

復多理堂都護

與舒輔廷都護

與多理堂都護

與李希庵

與李希庵

與李希庵

與邢星槎觀察

與楊厚庵

與毛寄雲

與劉印渠中丞

與郭意誠

與左季高

復李希庵

與左季高

與彭雪琴

與楊厚庵

致劉印渠中丞

復趙玉班

與閻丹初

復毛寄雲

與楊厚庵

復趙玉班

復劉印渠中丞

與王孝鳳

復彭雪琴

復嚴渭春

與文式巖方伯

與王枚村觀察

復劉霞仙

與嚴渭春

與胡宮保

與楊厚庵

與彭雪琴

與鮑春霆

復李少泉

復多理堂都護

復鮑春霆

與多理堂都護

復李少泉

復多理堂都護

復多理堂都護

復許仙屏

與鮑春霆

復張凱章方伯

與楊厚庵

復趙玉班

與許仙屏

與胡宮保

與胡宮保

復多理堂都護

復多理堂都護

曾忠襄公書札卷一

與惲次山中丞

國荃於初四日肅泐蕪函恭賀崇禧計已仰邀垂鑒卑營抵巴
河後與各軍日事訓練約俟各營到齊方定進取惟國荃所轄
之營月需餉項逾二萬皆仰給於家兄行營糧台查糧台現在
有著之款惟江西按月籌給三萬與湖北之六萬耳分頒均給
則卑營每月不過得半餉也積日儻深支絀必甚入少出多目
前已難爲計萬一進兵東征之後萬口嗷嗷更難設想矣國荃
自援江以來事事皆蒙摯愛而中丞體恤之周無微不至私衷
感戴五內時縈尙冀慈雲普蔭俾無竭蹶之虞則荷戈磨盾之

徒悉戴仁施於無既耳夙叨拳注用敢稟聞

與劉用賓

久欽道範景仰恒殷祇以羽檄紛馳少修箋敬良深慙歉國荃
江楚奔馳數年僕僕昨率敝軍由湘中來鄂小駐巴河家兄擬
於廿四日率各營進紮黃梅以壯前路諸軍之聲勢茲有懇者
湘邑現建昭忠祠所有數年來湘中子弟凡隸各軍轉戰江楚
先後殉難者概請祔祀以慰逝者之忠魂而彰吾鄉之節義惟
鳩工庀材需費甚鉅敝營擬酌量助捐側聞哲嗣寶輪兄前所
部湘後右營有存留公項一款若以撥爲捐修昭忠祠經費則
盛舉易成集事更速素仰先生清操慷慨古道照人故敢以瑣

瑄相瀆如蒙惠允卽懇函知現在湘後營營務處何大令壽祺暨劉司馬連捷李參戎寶賢囑將前項存款實有若干俟江西總局餉到以便由糧台劃扣轉解湘鄉交正紳收存作爲助捐經費則有裨褒崇節烈之舉者多矣

與彭雪琴

二十日肅復寸箋諒登記室辰維建瓴東下破竹勦崇定如辦祝東路諸逆酋多有歸命投誠之意似此消息賊不難辦大功可告成矣預賀預賀家兄廿四日率各營啟行出月初可達黃梅咏帥與舍弟季洪亦於廿八日拔營前進希菴兄因太夫人抱恙暫難來營而所部已抵黃州亦隨咏帥同進弟請假回湘

改葬先祖墳塋明正卽赴大營得挹光儀之日尙長毋勞心交
牽注耳儀菴之世兄家兄已允月給薪貲畱在行營聽候差委
知關綺念並以奉聞

與許仙屏

月初肅復一函計邀英盼棘闥日內當可揭曉賢書捷報定在
指顧間快也何如從此玉堂金馬雲路高騰視弟之久滯軍旂
者相去奚啻天壤所望時惠好音以慰故人千里之祝是所頌
禱家兄於廿四日率各營進紮黃梅咏帥與舍弟季洪亦於廿
八日拔營前進弟仍回湘改葬先祖墳塋約明正可返大營耳
此次倏來倏去舉動本極輕率亦必爲眾論所詬病然在營與

諸將同進不過多一無用之人而回家料理先人事則非賤子不能謀也所以不顧眾人之議論聊姑行吾心之所安而已四路東征之局已併爲兩路下遊諸逆酋多有歸命投誠之意肅清長江或者來歲可告成功焉李少荃新補延建邵道從此可卽以官爲家亦可慶也

與李黼堂觀察

此間各軍日事操練均頗有銳氣可用惟家兄所部全軍月需餉十六七萬而現在有着之款不及十萬當東征喫緊之際每月虛懸數萬金無可籌畫家兄每念及此輒傍徨無以爲計屢思與閣下及江省各台座作請益之舉又不便遽行啟齒竊思

江右刻下全省肅清援師多調往他處閣下與諸白座籌備餉糈又已盡善盡美出納既殊於曩昔軍儲日見其盈餘洪潤浸多挹注較易況家兄一軍爲閣下素所拳注當萬分支絀之候必能設法援手以蘇涸鮒也家兄卽日有函奉商尙乞執事於中丞方伯前婉達壹是如能於月餉三萬之外每月另籌銀二三萬兩協濟家兄大營以資散放則東征數萬之眾悉荷仁施於無旣矣可否施行之處幸希玉荅無任翹企之至

與蕭浚川方伯

前聞雄師追賊至粵屢獲勝仗解桂林之圍卽以靖吾楚之邊圉至賀至慰比想振旅凱旋戎祺叶吉爲頌弟於九月初率敝

營赴鄂初二日抵巴河大營此間急盼大纛辱臨卽定進取家兄恐雄師深入或不免爲他處截畱故批迴札催詞氣頗爲嚴切蓋使尊處有所措詞免爲當軸維繫耳至相契之忱結於性命想麾下早已見諒矣刻下未知大纛行抵何處務希旌從速臨以慰眾望共事中原是所盼禱此間軍事操練如常大約本月下浣拔營進兵其氣象亦頗振作月需之餉咏帥尙能籌備普徧供億眞人傑也知關肫念用敢瑣陳

致多理堂都護

久深慕蘭未克瞻韓欽企之情與日俱積側聞雄才命世智勇絕倫遇大敵而不驚岳少保令嚴山嶽推至誠而逮眾郭令公

惠洽諸軍是以萬眾傾心三軍効命旌麾所莅羣醜攝威頌雲
霓者已徧江淮南北矣茲者建瓴東下晉搗桐城本百勝之雄
師摧屢北之殘寇不次之勲操券可俟其爲頌祝又曷可言荃
一介書生未嫻軍旅江皋于役昔曾謬請夫長纓而戎事久膺
茲實彌慙其短絆所幸密邇軍門得聆碩畫伏冀南鍼時逮俾
得奉爲圭臬藉免愆尤是則私衷所深爲禱祝耳荃於初三日
由宿松啟行初六日抵營適李希庵莅此今午隨同朱雲涯李
申甫諸君進關察看地勢尙易安營惟左路樅陽乃該逆往來
充斥之地金陵大營局勢又復如此必須各上台布置周密此
間始可逼城而營耳尊處近日進剿桐城情形尙乞惠示是所

感禱

復彭雪琴

今早專肅一檄因走伾馳赴宿松誤由大營轉遞日內恐未能
達覽午間接奉初六夜惠書猥以拙書粗筆辱及齒芬愧甚愧
甚並諭貴部戈船於蕪湖一帶迭有捷報足寒逆膽麾下與厚
帥上下梭巡辛勞百倍欽佩之餘尤深瞻念金陵功墮垂成大
局又爲一變頃讀廷諭有飭都眞翁馳赴皖北以遏該逆北
竄是另籌一軍懷桐兵力不免有所抽動耳此間約於十五日
以前先移右路各營進關駐紮一面開挖長濠而左路則少緩
入關以爲打援賊地步也一俟定期移營時卽當函商尊處戈

船同日進城以分城賊之力耳

與多理堂都護

李希翁昨在此間指畫一切已於今早回青草壩此間擬於十五以前分右中兩路先行進關駐紮前年壘地扼制城賊壘成之後卽分地段開挖長濠左路則仍駐關外以防援賊俟大肅克復桐欏攻皖之師乃進而合圍東路耳國荃閱歷太少毫無把握刻下與朱李如此布置未審其有當與否此地爲麾下昔年戰勝攻取之所形勝利害久在洞鑒之中尙希指示方略俾得有所遵循是爲至感

復舒輔廷都護

久企英名擬肅箋致候乃蒙藻翰先施拜讀之餘慙感交集承示此間移營進關之時麾下卽派馬軍助勦具見垂注全局之心不遺在遠而敝營等得貔貅之先導以愈壯其聲威誠至願也敢不拜嘉惟昨接多都護來函似宜少緩入關現擬部署周妥後定期移營卽當預告麾下派撥勁旅以爲此間之倚賴耳國荃樗蒲弱質謬逐戎旃尙希時錫南鍼俾有法式是所感禱再者弟軍先擬十二三將右中兩路紮進關內駐多鮑舊壘中一心開長濠以制城賊而畱有餘兵力以俟援賊之至希帥謂此說可行而各上台頗以金陵潰敗之變諭旨飭直夫將軍率馬步馳赴江北恐懷桐兵力將來亦不免微有抽動所以尙

未議定進關耳其應遲應速之機究竟何如乞惠函訓示爲幸

致劉礬室

前於宿松小聚快挹風襟醉酒飽德感何可言弟於初六日抵高橋嶺營次連日與雲涯申甫諸君子進關察看地勢擬於十六日移右路六營入關紮多鮑舊壘爲第一層移中路七營入關紮壘爲第二層而畱左路三千餘人仍駐關外以防援賊而作關內各營之後應一俟多軍桐城得手李希翁進取樅陽卽可合圍皖城耳申夫兄一營弟亦畱駐於關外前敵戰陣之事雲涯一人作主甚好可省諸將多一番請示也知勞盞注謹以奉聞弟過長沙之時尊府寄來馬鞍一副昨由水路便解來營

擬卽畱此應用想尊處必肯惠我也

復舒輔廷都護

昨於酉刻肅復一函計呈英鑒頃奉貴弁賁到惠書敬悉已承
麾下派馬隊二百匹於十五以前趕到此間感佩無似查城賊
馬匹不過七八百得麾下勁旅二百又益之希公馬六十四足
以破犬羊兇逆之眾矣不敢重勞大纛親臨也此間局面無所
謂糧台無所謂局紳卽麵料米糧亦須尊處派人自行照料寸
心殊覺不安一俟老營紮定尊處馬隊乃可令其回青草壩耳
至國荃謬逐我行諸事未諳幸得近依光霽不吝教言深爲銘
泐乃來示極承謙抑殊令人緬想高風倍增依結耳

復李希菴

昨布寸函由舒老護差弁轉遞計邀英覽頃得十二夜復書敬
悉一切輔廷舊派來之馬隊自應爲之照料加意優待但麵料
米糧等件此間無局亦無明白董事之紳又無別項錢文可代
仍須舒公自派人採辦乃能合用耳麾下更益以馬隊七十匹
則威勢更壯矣至棚帳米糧皆自攜帶老兄之所體恤此間者
更復周摯感何如之騶從卽日過多軍會商必另有一番部署
其定議如何勦辦之處尙乞隨時惠示一切爲禱一俟此間老
營紮定則尊處與舒公馬隊方可回青草壩也

復李希菴

昨布一函計登台覽夜間十四日申刻惠書並咏公致尊處一函敬悉種切下游之局勢既變如此此間自應緩進第以全局而論桐懷爲楚北門戶竭數年之兵力始得爭此尺寸之士又復舍而他顧則是棄已復之近地而救糜爛之遠疆緩不濟急於彼無甚益而於此則有大害也況此枝兵力僅萬人物力人材皆難特樹一幟何能縱橫於遍地皆賊之中此高明之所知也似仍以合圍皖城爲相安弟接家兄函時卽以此意往商未審家兄與咏帥以爲然否而廷命究復何如亦難預揣耳此間已於今早均出隊進關修築牆壘賊亦未出晚間仍收隊出關暫不移營俟再得家兄後命乃搬棚帳入關也舒公之馬隊

今日亦出集賢關埋伏昨日到此弟力甚薄擬以酒肉貺之

與李希菴

十五日申刻布復一函計登記室此間於十五早出隊入關而薄暮仍收隊出關者以俟家兄復信故修牆壘而不卽移棚帳也是日城逆負隅如故收隊時始出數千人經尊處馬隊迎擊舒公之馬隊亦左右策應頗有斬獲馬隊之受傷者四人幸易醫治其時已日暮未便追至城邊也昨接家兄來函準此軍入關俟奉 旨後再據實復稟難抽云云十三日復稟之稿已將陸軍業近皖城實難抽動下援情形據實陳稟矣此間仍定於十八日右中兩路移入關內駐紮知念並聞

與李小泉

久睽叔度時結懷思月前由湘來鄂適尊舟先發一日未及謀面滿擬至家兄大營必可晤教乃鄙人抵松滋時騶從又赴江省緣慳晤對雲樹之思彌縈心曲弟於初六日抵高橋嶺營次皖垣之賊經水師連旬轟擊伏固不出其意在堅守以待援也此間各陸營於十五日入集賢關修築牆壘十八日移右路六營入關紮第一層移中路七營次之左路亦擬於日內移五營入關駐紮而畱三營駐關外皆深溝高壘首尾聯絡庶內外關之氣味呼吸相通如遇援賊即可分兵力擊之耳惟樅陽爲寇賊充斥之所此路不塞則東門難以合圍已函商多都護李希

菴兩公請於桐城青草壩兩軍內酌撥馬步四五百人乘援賊
未來之時先取樅陽樅陽克則懷桐之賊皆成孤注而官兵得
以一意圖剿矣第未審多李以爲何如耳知念並附及之

與蔡荷亭

國荃由湘而皖於月之初六日抵高橋嶺營次吾鄉新修昭忠
祠及東皋書院得閣下與諸君子鳩工庀材目前想已興事至
董捐一節已與李希菴兄商定凡吾邑之在外帶勇者每營官
議捐銀二百兩所有該營先後殉難弁勇無論何地之人均准
其立總主入祀其總收營捐者在皖之軍由希菴與國荃彙集
在楚之軍由張凱章趙玉班劉靖臣諸君彙集在蜀之軍由蕭

浚川彙集已分別函商請其捐齊時委員經解局中驗明以作
經費矣至李忠武捐銀二千兩家兄捐銀千兩敝營捐二千兩
容日卽當彙解局中所有各都捐項想閣下與邑紳必已廣爲
勸導多多益善耳

與鄒嶧峰

臨川別後十易蟾圓雖魚書往返情愫少通而洄溯之思究與
時俱積也弟客冬因先叔病重由巴河旋里今春經營葬事後
閏月三日由湘啟程廿七日抵宿蘇大營月之六日抵安慶之
高橋嶺營次皖城經水師轟擊伏固不出此間各陸師於十八
日移右中兩路入集賢關駐紮廿二日亦移左路五營次之而

關外則畱三營以扼桐樅之路均深溝高壘首尾聯絡庶內足以制城逆而外足以防援賊制人而不制於人也知關蓋注用以布聞再有懇者客歲在撫都時其居停謝氏重鐫皇朝輿地略一書繪中外之版輿於方幅之間一郡一邑一山一水皆朗若列眉明如指掌實爲行軍之至寶而又便於攜帶以致營中共事之友爭相珍賞莫不欲得一部以爲快務懇閣下於謝宅代刷三五十部惠寄來營是所感禱其工費紙張之貲則請謝宅暫給或由尊處代給容日如數寄還弟亦有函奉託謝雲卿兄恐其遠遊是以特懇尊處也

龍城別後冀英倏更南望楚雲時深馳系弟由湘而皖月之初
六日抵安慶之高橋嶺營次此間陸師分右中左三路十八日
移右中兩路入集賢關駐紮廿二日又移敝軍與營務處一營
繼之駐關外者舍弟之湘恒兩營及吉左一營耳皖城之賊負
隅不出其意在堅守待援我軍之陸師現圍西北一面開掘長
濠惟東門通樅陽一路爲寇賊充斥之所必須先剿此路而後
可合長圍耳自金陵大營潰退後蘇常相繼告陷張殿臣軍門
與和帥死之杭州亦有岌岌危殆之虞計自軍興以來大局決
裂未有若此之甚者家兄已奉諭旨令其赴援下游遏賊北
竄然無良將勁兵足以馳騁縱橫於徧地皆賊之區而此間爲

荆楚門戶一行抽動於胡李多鮑之陸師未免少一枝幫助而與楊彭之水師亦不得相爲倚護殊無把握時勢日艱辦理愈形棘手想有心世道者所同深浩歎也家兄昨以弋獲賊報有分兩大股一由六合天長等處竄擾楚北一由徽州一帶上竄江西牽制官軍等語已飛咨江楚各大吏於邊境要隘堅壁自守爲未雨綢繆之計並懇南中丞速籌勁旅以助西江一臂之力矣邑中興修昭忠祠復修東臯書院得賢父母主持一切定不日可成此舉也揚忠義之清芬啟士林之觀感使文武皆有所效法良足以永垂不朽但祈告語董事諸紳規模宜廓大創造宜堅實庶數十百年守成之君子易於補苴也

與李希菴

飛啟者頃方逢運專人來稟稱今夜四更卽約舉事弟與雪琴已預備水陸拚力擊入城中止畱東門爲賊去路如天之福能倖成克復之功則爲至幸來稟鈔錄呈覽務祈麾下
一面派撥馬步大隊一面飛告多公除畱隊緊扼桐城之賊出竄外請尊處或派人至桐城或分桐城之師飛至樅陽亦是最妙之着尊部與多公多派馬步隊直由樅陽一路沿途截戰以期盡殲此股是爲至要盼切施行

與李希菴

昨夜飛專一信告知尊處後弟與雲涯卽派大隊分頭埋伏以

備舉事至四更後見城中舉火我軍之奮勇卽遏賊卡直抵北門城根乃方學凱竟未開城我軍水陸乘勢攻城攻壘至辰正時乃收隊回營是役也內應之舉不可靠幸我軍攻勦尙屬清吉所有昨夜冒昧請麾下及多公派馬步追截樅陽一路之說卽請中止並祈飛告多公免其出隊也弟信人太過尊處與多公均祈原諒一番爲荷

與李希菴

昨日辰刻肅布一函計登英陳家兄昨奉 廷命簡兩江總督令辦江浙軍務擬部署後卽南渡分三路進兵也然此席殊不易易想老兄必有代爲之策者奉寄 諭旨一道祈尊覽除遵

選將材預濬餉源二大綱外尙有急宜舉行之事懇老兄惠示家兄一切爲荷

復多理堂都護

此間各營移駐關內後日掘長濠連日與彭雪琴方伯密購內應廿八日降寇方學凱專稟出城以舉火爲迎納故是夜函告希菴兄囑其轉布尊處事機未成而葉逆卽已先覺故不果行我軍僅於五鼓時環攻城壘一次亦卽收隊比又函告希翁想亦轉達尊聽矣家兄昨奉 廷命授兩江總督督辦江浙軍務擬於日內部署一切後卽行南渡分三路進剿然此席殊不易易麾下志謀碩畫尙希惠示家兄一切是所感禱

與楊厚庵

前寄賀函並粗筆計已達覽家兄近奉總督兩江之命日事籌備調集軍力以謀渡江而南所有應辦事宜想常與麾下商一切矣頃聞貴部戈船將樅陽賊壘一律盪平不禁距躍三百該處爲懷桐門戶奪此要隘則城賊卽成孤注我軍可以合圍矣然非麾下之英謀碩畫將士用命亦不能如此神捷欣慰之餘佩服無量第樅陽克後未審卽以韋志俊陸師與貴部戈船扼守乎抑或與咏公商定另籌陸軍拒守乎想勝算必已妥爲布置矣祈惠示爲禱敝營擬於節後卽移紮東門外以開長濠樅陽旣克將來貴部戈船卽可進石塘湖菱湖使我陸師有

所依倚側聞此次收納降卒近千人甚善甚善自此韋部更不單矣濱江一路進兵之法究用以毒攻毒爲妙若韋部隨麾下戈船專任攻池州以勦蕪湖之賊必能所向有功昨聞雪琴云來援池州之賊乃與韋有舊交意欲託韋乞降於麾下儻家兄與咏公能謀得餉項養此一枝降卒則將來亦可得其死力不知現在尙有機緣可辦成此事否祈畱意爲幸是否有當冒昧陳說想大君子必不以鄙言爲妄也

與張伴山

節前奉復一槓計登偉盼日前敝營謝委員在尊處請領之閏三月餉銀七千兩內共大寶七十三錠已捶三十錠內僞銀六

錠每錠內其失耗銅鉛二十五六兩二十兩不等殊堪詫異值此軍餉支絀之時口糧已改放湘平而此項寶銀僞耗如此之多則此款從何彌補且各營之受累必多矣若不澈底澄清恐僞造者益爲得計而各營之賠累日深無從辦事也此次寶銀封面皆係糧台印封究係由何省何局解到者敝處無從查考應請詳查有無弊端惠函示知如係局匠之弊或由尊處查明指稟或由敝處通稟請各憲追究根由以杜後來之流弊則將心勇心皆不至有解體之虞矣閣下以爲然否

致黃冠北

前奉惠函藉諭珂鄉春間有萑苻之擾經閣下內固城垣外揮

聯勇旬日之間迭馳露布使狼豕無奔突之虞而地方獲安全之慶其爲功德照耀梓鄉欣佩奚如弟於去冬因先叔病重請假還里今春經營葬事後於閏月三日仍由湘來皖二十七日抵宿松大營家兄畱住數日至月之初六始達高橋嶺營次此間拒安慶城尙二十餘里昨進集賢關察看地勢尙易安營惟左路樅陽爲寇賊充斥之所而金陵大營又復潰退鎮江諭旨令都將軍另籌一軍馳赴江浦天長一帶遏賊北竄是懷桐兵力尙不免有抽撥必須各上台布置周密方可逼城而營耳知關錦注並以奉聞撫州所樹林君碑祈情友人刷二百分擬硯台記祈刷二十分便中寄營爲荷所需紙本工費祈暫代出

兄到鄂垣時弟卽奉上也

致蕭浚川方伯

前奉正月二十五日惠書敬悉繡節西征防勦蜀地以百戰之雄師作三省之控馭知歌功頌德者必徧彼都之口矣惟貴軍現駐何處近日蜀省情形若何統希示悉以慰遠懷是所盼禱弟於春孟遭季父之喪經營兩月之久始妥葬事閏月初三日由舍起程二十七日抵宿松大營初六日抵高橋嶺一俟布置定妥方可逼城而營耳湘中現修昭忠祠並復修東皋書院需費甚巨邑紳議定除每都勸捐外尙須弟與希庵兄倡勸營捐乃可成此兩舉昨與李希庵兄商及凡吾邑之在外帶勇者每

營官議捐銀二百兩所有該營先後殉難弁勇均準其立總主
入祠以享祭祀而彰節義伏思麾下部曲多湘中子弟其管帶
官係同籍之員當有數人乞囑令各捐銀二百兩卽由尊處委
員徑解湘邑交局紳彭行齋黃介臣朱嵐軒蔡荷亭諸君手以
便構材鳩工庶可不日落成此爲吾邑之義舉四月業已興工
總收營捐者尊軍由麾下彙集在皖之軍由希公與弟彙集在
楚之軍由趙玉斑張凱章彙集凡屬營官從事戎行者必樂於
從事也至於立總木主一層祈諭明出捐各營官查明該營陣
亡弁勇官級姓氏無論何府何縣人皆可上列總主伏祈飭其
彙冊寄局爲荷

致毛寄雲

巴河別後忽忽數月矣前於湘中兩接手械敬悉種切並蒙惠錫四種精雅無匹二千里外猶復拳念弱弟情文篤摯感何可言弟以違門多故久未裁報良用歉然弟於春暮料理先叔葬事後閏月初三日由湘啟行廿六日抵二套口易舟而陸廿七日抵宿松大營知關蓋注並附及之蘭譜一分重訂奉上祈查收吳應昌如共事一方自當令其展布所長儻有功績必爲之播聞於上也

致李雨蒼

久不晤叔度懷想日深前於里門得手書欣悉太湖之捷卓著

勲勞此爲吾弟發軔之始卽建懋功將來事業必有遠勝於時
流將帥者爲吾弟幸更爲吾弟祝也刻下貴軍隨多帥進搗桐
城想易奏績彼中情形尙望隨時示我兄於閏月初三日由湘
啟行廿七日抵宿松大營家兄畱住數日月之六日始達高橋
嶺營次此間擬於中旬內先分右路進紮關內而左路則少緩
入關以防援賊也昨聞金陵大營潰退局勢爲之一變諭旨
令都將軍另籌馬步數千人進剿江浦天長一帶遏賊北竄恐
懷桐之間兵力又不免抽動耳劉必友吳開勝在尊處辦事不
力兄亦殊覺慙汗晏思訓雷復勝經弟教訓一番將來或尙可
造也

復舒輔廷都護

貴弁至奉到惠函具微謙抑逾恒虛懷若谷雖古大將何以異此敬甚佩甚承示速圍安慶卽以牽制下游之賊卓見尤爲超越希帥來函亦謂如此此間現在決意分右中兩路進關駐紮定期十五日昨肅函懇麾下預期撥馬隊三四百匹前來以壯官軍聲威想已達鈞覽俯賜施行矣

復多理堂都護

昨奉還諭頃間又接環章敬悉壹是金陵局勢變遷緩進之議本屬至理而國荃擬先分軍入關者一則可掘長濠所守者約一則以下游消息旣緊此間進逼皖城或足以稍牽賊勢將來

如有援逆上犯仍當有備以防之也茲承明示此間定於十五日分右中兩路入關駐紮並蒙舒都護允於移營之日撥馬隊前來以壯聲勢矣知關蓋念謹以奉聞尊處近日壁畫及所得各處消息並皖城內探報尙乞隨時惠示爲禱

與舒輔廷都護

十三日肅復一函計已早呈英鑒安慶之賊連旬經水師轟擊亦未能出關挑戰此間陸軍各營於十五日入關修築牆壘承麾下派來之馬隊及希翁馬隊均入關策應紮營是日城逆先伏不動申正始出數千人距城根不過二里經貴部及希庵馬隊迎擊頗有斬獲因日已暮故未進剿也十八日天霽移右路

六營入關紫第一層距西北門不過三里移中路七營紫第二層相與首尾聯絡是日馬步亦皆出隊至城東北隅預備開仗城賊先亦負固旋出數千人瞭望官軍壘地經馬隊及前敵各陸軍擊之賊卽退入城內現擬明日移左路入關紫第三層而畱三營在關外扼桐樅來路庶聲勢更易聯絡而內外關之氣皆呼吸可通耳查征皖之師逼城二三里紫定老營地勢尙好深溝高壘足扼西北兩面惟東門至樅陽之路目前尙未能斷絕近將開挖長濠以制城逆如遇援至則可分兵力迎擊當無虞也惟城中之馬匹頗多前請宿松派撥馬隊尙未到此所有貴部及希公馬隊擬畱此多駐數日頃晤烏璞山兄云接麾下

信飭令回青草壩營用特函商麾下如可多畱數日俟家兄派來之馬隊到此卽請貴部回青草壩大營則感紉無似如日內必須回營之處亦希示知國荃亦不敢強爲羈畱也

與多理堂都護

昨夕肅布一函奉告此間情形計邀英盼矣安慶之賊負固不出欲以堅城綴我師旅而徐待外援之至竊計五月以後援賊當必來矣爲今之計欲急制城逆之死命則非合圍而開長濠不可欲合圍則非另有勁旅先取樅陽不可若樅陽旣得可以扼援賊之來路使此間無內顧之虞而後移我關外各營進圍東門則城賊遂成孤注側聞麾下勝簫將與希公派軍先謀樅

陽近日想已部署就緒如值此援賊尙未上犯之時由麾下派馬隊數百匹酌帶貴部部隊六營乘勢前去則樅陽定可垂手而得所謂六營者如李趙楊朱陶梁諸君所帶之督標新中左右前茂字義中等營當足以勝任也或更由李希翁處添撥二千人十營之中或由尊處派人作主或由希翁派人作主會合水師乘間攻取使樅陽之賊如迅雷不及掩耳則克之必矣樅陽克乃別謀一軍守之深溝高壘以逸待勞反客爲主與水師相爲倚護援賊如由此路來桐懷則坐而擊之庶圍剿桐懷之軍得以壹意圍剿桐懷而無左顧右盼之虞耳管蠡之見是否有當尙乞麾下與希翁察核施行無任翹企

與李希庵

國荃側聞勝算將與多都護派軍先謀縱陽多軍暫不合桐城之圍兵力尙可抽撥值此援賊尙未上犯之時由多公派撥李趙楊朱陶梁等之新中左右前茂字義中六營並益以馬隊二百三百匹更由尊處添撥二千人十營之中或由尊處派人作主或由都護派人作主會合水師乘間取之則必克矣如都護慮及桐城之賊潛襲勦縱陽者之後路或由青草壩更分兵力以扼桐城之出路如桐賊肯出則雙管齊下而桐縱同時可以奏績如其不出則俟縱陽克後仍調回老營俟援賊至再行相機而動是亦可以備一說也台從近日想恰在桐城必已早與都

護商之矣祈示知爲荷

與李希庵

昨奉還章謹悉一切頃接家兄來函知得張小浦先生信蘇州已於十三日寅刻失守聞之不勝憤悶原函抄覽大局之變一至於此京倉乃命根所在畿輔將如之何想有心人聞之所同深痛哭者也江北宜急舉事或尙可以制之延至秋初恐又來矣國荃所以商請先擊樅陽者亦此意耳

復李希庵

頃接廿五日環章敬悉一切姑蘇旣變而貴軍與桐城之師又迭奉詠公函囑緩進自應不可輕動然鄙意家兄卽奉朝命

總以仍辦皖北軍務爲是若另籌一軍來皖逼城以制皖賊而固鄂疆則各軍亦有不敷分布之慮焉蓋大局旣潰裂則不能不先保江北已復之疆土而徐圖江南糜爛之郡邑若無益於彼而或少有損於此則於蘇杭莫救其失而於荆楚之門戶不無稍鬆也皖賊近仍未出彭雪琴今午來此小談一餐而返亦主先靖北岸後圖江南之論麾下洞悉大局又能權衡此軍力量之強弱家兄又夙服高明之見尙祈代爲熟計而詳示之是爲至禱

與邢星槎觀察

別且半載靡日不思到營後又久疏箋候而依慕之情究未嘗

少澹也弟於閏月初三日由湘而皖月之初六日抵高橋嶺營
次皖城之賊負固不出此軍各陸營於十八日移右中兩路入
關駐紮廿二日又移左路五營繼之而留三營駐關外扼桐樅
來路皆深溝高壘首尾聯絡庶內足以制城逆而外足以防援
賊耳惟姑蘇不守大局益變殊令人聞之痛哭不已也長公一
軍恐 廷命令其赴援江浙咏帥以其所救者大故亦主去此
適彼之說鄙意以爲此軍離開賢主人而不與楊彭之水師多
李之陸軍相爲依倚而遽渡江以南量力而謀深慮其不足以
張吾軍而轉爲有礙於大局也先生試與咏帥熟計之而定此
軍之進止權衡目前之利害孰絀而孰優耳奉上拙書粗筆祈

堯存

與楊厚庵

前晤雪翁知大纛親至池州蕪湖視師不久卽聞英嘉匪之捷繼又聞池州之捷賊壘悉平擒馘無算欣慰奚如此間陸營於十八日移右中兩營入關廿二日移敝軍與營務處次之駐關外以扼桐樅來路者維舍弟兩營及吉左一營耳然皆深溝高壘首尾聯絡內外之氣呼吸可通而前敵倚西北一面現在趕掘長濠惟樅陽未克東門一面尙不能遽合圍耳聞雄師克復池州後將一舉而掃平樅陽實爲皖局之慶姑蘇於十三日寅刻告陷杭州極爲震驚大局之變一至如此想有心人所同深

痛憤者也家兄一軍已偪紮此間恐 廷命令其渡江而南然
乏勁旅良將又遠離麾下與雪公之戈船及多李之陸軍則此
萬人者殊難確有把握耳奉上拙書粗簞一柄祈莞存鑒納是
幸

與毛寄雲

初十日肅復寸函並蘭譜一分計登英牒矣皖城之賊伏固不
出此間各營於十八日移右中兩路入關廿二日敵軍與營務
處一營亦移入關內惟畱三營駐紮關外扼桐樅來路皆深溝
高壘首尾聯絡庶內外之氣呼吸可通耳下游之變猝出意外
實爲軍興以來未有之奇禍當姑蘇喫緊之時浙撫已三次奏

請家兄赴援今蘇城已於十三日告陷南渡之命或者旦夕可
至然此間爲荆楚門戶若舍而他顧則胡李多鮑之軍又少此
一枝幫助矣無濟於浙蘇而不無稍損於皖北東南事其何日
可平乎又此萬餘人中尙乏獨當一面之將足以縱橫馳驅於
江浙之地而游刃有餘者所以不能信其確有把握也近日襄
樊一帶想極安謐珂鄉歲事想豐稔潭第想均臻第祿念念

與劉印渠中丞

建陽別後裘葛已兩更矣側聞麾下勳譽日隆天寵益篤荷
酬庸之異數晉開府於桂林惟聖主知人畀封圻可屬大事
惟雄才命世建節鉞以總師干將見靖全省之狼煙圖勳臣於

麟閣金饒唱凱銅柱揚威馬伏波之事功必復見於今日矣粵西爲寇賊出沒之區糜爛已極得麾下提綱挈領洗髓伐毛內修吏治外整戎行必能除積弊挽頽風而使數十萬水深火熱之民仍登衽席頌何如之竊謂當今求治之急務首在得民心尤在得本地之人酌而用之或帶勇或練團本此邦所產之材而辦此邦之事形勢既熟於胸中人心亦易於聯結其有裨於客兵有益於地方者良非淺鮮客歲弟在巴河時有鄢生守愚者桂林人也比因一晤未得深談今夏復來謁於安慶營次聆其言論覘其心志似於軍事甚爲練達而於粵西之形勝要害尤瞭然心目非徒言大而誇者可比弟思粵省正需才之時用

特推轂於大匠之門不惜數行爲之介紹伏望麾下進見時細
談而詳察之如其人可用則委以營官之任使召鄉勇五百人
自行訓練仍仿楚軍營制以試其才力如何果克言行相符不
致僨事俟著有成效然後徐圖加募俾樹一幟伏惟麾下裁度
施行幸勿置之閒散鄙生當能感激圖報耳又查守愚少年時
盛氣凌人人多銜之銜之不已又從而控之渠於近年來奔走
風塵備經磨練有志事業已大改前非矣如有稱其素行不端
者今既改轍祈麾下破格用之爲幸安慶之賊負隅堅守以待
外援我軍駐集賢關內者八千餘人駐關外者約二千人皆首
尾聯結呼吸可通內以制城賊而外以防援逆廿九日五鼓會

合彭雪翁戈船圍攻皖城一次因堅守嚴密未能得手多都護
現攻桐城李希翁駐青草壩與懷桐之師兩相策應金陵大營
潰退後蘇常相繼告陷張殿臣軍門與和帥死之杭州亦岌岌
乎有不可終日之虞家兄頃奉 廷命授兩江總督令其卽赴
下游援剿大約日內布置一切後卽南渡分三路進兵也家兄
昨以賊報有云分爲兩大股一由六合天長繞竄楚北一由徽
州一帶上犯江西牽綴官軍等語已飛咨江楚各大吏於邊境
要隘堅壁自守合三省之兵力爲未雨之綢繆未審各當道能
照辦否知關蓋注並以縷陳粵中情形風便尙希示悉爲禱

與郭意誠

抵營後曾兩上寸箋計登英盼皖賊負嵎如故此間各陸營移紮關內後日掘長濠因構有內應廿九早五鼓會合雪翁之水師環攻一次未能得手失此機會殊可惜耳昨閱浙撫函姑蘇於十三日寅刻告陷杭州有岌岌乎不可終日之虞家兄昨已奉旨令其赴援下游遏賊北竄想閣下慮周全局鑒輔車之義切唇齒之戒必已與中丞公商定速籌勁旅以助江右一臂之力矣季叟想已抵楚不白之冤得昭布於天下從此奉到諭旨更好放手爲之耳

與左季高

前得家兄書知騶從已於望後還楚想行旌叶吉必已安抵潭

府至爲忭念皖賊自陸營移駐關內後負固不出我軍惟日掘長壕廿九早五鼓與水陸各營環攻一次亦未能得手姑蘇於十三日告陷杭州岌岌可虞家兄頃奉 廷命授兩江總督令辦江浙軍務擬部署後卽南渡分三路進兵也然此席殊不易易想老亮必有代爲之策者遴選將才預濬餉源二大端外尙多細目惟老亮成竹在胸吾輩可以共信而非所論於新亮也有鄢生守愚者桂林士也客歲弟在巴河時匆匆一晤今復來謁於安慶營次聆其言論於軍事似爲練達而於粵西之形勝要害則尤瞭然於心目弟見其有殷殷用世之心而又熟本省之形勢故爲作書轉薦於卽渠中丞尙希閣下亦予一函俾自

達於印公之前使募數百人以試其才想大君子亦必樂於汲引也

復李希庵

頃奉初三初四日還章敬悉一切以精銳直搗鎮常出賊不意此着最爲扼要鄙人昨得厚兄樅陽克捷之信卽以此意商之請令韋志俊一軍及新降之眾由池州直搗蕪湖蓋以毒攻毒更可省我兵力若能籌得口糧則此輩必出死力也承示騶從卽日起宿松與家兄面敘則諸務更好籌商南岸北岸合成一家辦賊則得手更快耳

與左季高

前由鄔守愚帶呈一函計邀英盼昨讀 廷命知武侯上契

宸衷天下幸甚蒼生幸甚長公咨商請辦各件計閣下與南中
台座面爲籌畫當不難一一響應也新募五千之眾好營官亦
不易得夾袋中尙多儲蓄將來成軍必大可觀其果請霞兄統
來乎抑老兄親統來皖乎盼切望切家兄因調此間之朱唐二
營飭敝營亦添募二千以補其闕現委營務處彭毓橘率周惠
堂張詩日彭萬全李臣典帶哨官十餘人赴湘召募其帳棚鎗
礮軍械及募勇之費與來皖川貲均請閣下惠商南中各當軸
速爲籌發俾得迅速成軍星馳來皖是所感禱皖賊負嵎如故
樅陽賊壘經楊彭水師連日血戰悉蕩平之奪此要隘則此間

方好合圍耳

與彭雪琴

頃閱湖北撫標營務處轉奉翁中丞咨行賊報有偽忠王李壽成糾合大股由六安竄英山而救懷桐等語查狗逆前與皖賊之信卽有分股由六合上犯之意此自屬意中事茲鈔呈祈察閱樅陽可卽用韋志俊依護水師守之否祈與厚叟酌之台旌已回老營否如稍暇祈來敝處商量擡飛划來掃菱湖之事也

與楊厚庵

前得樅陽捷報卽肅函布賀計達英盼皖賊伏固不出其東門三壘皆倚隄埂以賊船爲依護必須先奪賊船而後可以攻壘

弟已與雪琴兄及貴部蔡遊戎商擬明夜擡飛划十餘號十二早黎明入菱湖出賊不意以搶其船隻弟等出陸師助之如得其船則賊壘亦易圖之矣如攻壘時尙希雪琴兄與麾下飭樅陽水師由石塘湖繞至賊梁以大礮轟擊爲禱聞大燾已至池州矣韋至俊一軍其卽令守樅陽否乎

致劉印渠中丞

月朔肅泐賀函交鄔守愚賁呈計登英鑒皖賊負固幸樅陽逆壘經戈船一律蕩平奪此要隘則城賊勢成孤注我軍亦好合圍但援賊將至不能不留有餘兵力以待之耳家兄定於十五日移師南渡惟新募之眾旣需時日卽奏調咨調各軍亦難遽

集恐一時尙不能進剿耳茲有懇者敝同鄉陳君舫仙名湜弟于役吉安時卽在敝營襄治營務嗣於七年秋奉諱旋里八年保敘主簿蔣薌泉兄募勇赴粵遂強拉舫仙同行令帶營勇比以戰功保敘知縣畱於粵西補用旋因病還里不宜粵西水土是以不願爲官於粵九年春賊寇湘南甚急中丞公復令帶營會剿祁陽寶慶一帶以先桑梓之急而廣西之行是以中止方中丞公用舫仙之日卽家兄札調舫仙之時寶慶事平已敘同知矣弟於去秋曾函告薌泉兄亦未蒙復示也本弟營相助得力之人以彼之強有力從而奪去亦殊不近人情耳昨聞尊處復檄催調之粵中軍情亦值喫緊之時舫仙曾帶勇在粵自應

令其前往第目下蘇常決裂大江南北尤爲喫重舫仙旣奉家兄札調而來敝營又正需人孔急之時未便遽令赴粵夫在彼在此同一効力戎行原無分於畛域況台端夾袋儲蓄人材最多不必定需舫仙前往而在此間則弟營裨益多矣薌泉若挾私見以浸潤之言愬於台端之前則乞大度含宏不以違命之愆見責陳君則感激如同身受抑亦勸薌泉多種善緣則將來之獲福不少也

復趙玉班廉訪

勇回接初二初八日復函娓娓千言備悉壹是拙書本極無法一經獎掖彌增愧怍季叟前以家兄覆奏比日卽奉四品京堂

之命襄助軍務昨讀廷寄意以蜀事相屬蜀中爲吾楚近鄰濬翁以拂鬱致病不起得季叟督辦彼中軍務則西鄰之幸亦南楚之福也此次覆奏宜長公主稿長公昨與咏帥商將以季叟公諸蜀不以私諸皖已請咏帥專函往商矣霞仙以咏公密保已有旨敦迫出山此時想已募勇矣其果二千五百人乎抑六千人乎念念老兄爲南楚保障駱中丞所倚重之第一人長公亦不敢相強使桑梓無所繫屬也此間家兄赴祁門弟先期往候昨日始返營次並以佈聞

與閻丹初

昨讀咏公舉賢一疏知當代名賢獲邀天聽從此君子道長

而撥亂反正之機見矣慶甚慶甚家兄於二十日至黃石磯與厚庵雪琴諸君子面商一切弟亦先期往候至二十七日始啟行赴祁門也此間圍剿如常無足告慰惟各營懸欠餉糈業已數月支絀萬分極知家兄此次督辦吳越軍務大江南北需餉倍多在閣下與諸君子供億浩繁自有應接不暇之勢第此間正值圍攻喫緊之時需用甚急尙乞閣下籌備巨款惠解北岸糧台以濟要需是爲至感再敝營前領閩月餉內有偽寶銀九百餘兩據糧台函復係由鄂垣籌解伏思尊處每月協濟各軍之款不下二十餘萬皆絲毫無僞而此次敝軍所領之項假銀近一千之多大約由原解之局匠或有浸蝕灌鉛之弊當此艱

難萬分之時各營口糧改放湘平營中日形竭蹶而造銀之局
匠乃敢漁利其間亦殊可惡鄙意此後各處解赴鄂省之款應
請尊處遴派認銀好手細心認看如有僞者比卽擲還該局補
換並責令根究庶僞造者知所做懼矣厚叨摯愛用敢瀆陳

復毛寄雲

頃讀手書敬悉貴體偶抱清恙刻下想已霍然矣念念長公奉
總制兩江之命於十五日由宿松啟行二十一日至黃石磯
與厚庵雪琴諸君面商一切弟率舍弟事恒亦先期往候焉二
十七日卽拔營由東流建德馳赴祁門也現隨長公南渡之眾
不過萬餘人擬暫駐祁門東聯徽州之聲援西保饒州之門戶

侯奏調之張凱章一軍及劉霞仙李次青諸君子在南新募之
勇到齊而後分三路進剿計在七八月間矣左季高前以家兄
復奏卽奉四品京堂之命襄辦軍務昨奉 廷命意以蜀事
相屬長公擬卽奏請督辦蜀中軍務庶於楚鄂均有裨益也昨
讀咏帥敬舉賢才一疏知老兄已上達 天聽方牧之升封疆
之畀皆不足爲老兄榮慶惟君子道長吾黨之幸實天下之幸
也弟謬膺攻皖之寄靡善足陳西北之長濠已成東路克復樅
陽後接濟已斷現惟多畱餘力以防狗逆上援耳

與楊厚庵

弟回營後城賊亦無甚動靜蔡遊戎飛划紮菱湖甚覺相安暫

時可不必擡出也老墳頭之奸民與賊通商此間陸營相距較遠必繞道乃能前往已函請貴部韋遊擊就近派隊搜剿並勒令奸民遠徙韋已允相機行之秋節伊邇東門外之稻田皆實穎實粒若不及早合圍則此數萬穀必將以資寇糧麾下前有惠臨敝軍審看地勢之意未知果於何日移玉乞示定日期以便預請希庵兄屆期同至可以面商一切定奪施行也

復趙玉班廉訪

初八日專勇暨呈一檄月底計可達覽頃奉五月十八夜惠書敬悉種切麾下爲南楚長城中丞公實倚賴之自不能遽事東征亦遠人所逆料桑梓所共瞻者也石逆出巢大有窺伺楚邊

之意經意叟合老籌謀部署處處周密該逆必無隙可乘佩甚
佩甚表忠祠公啟及刊刷摺稿章程各五十本已收到此外楊
彭李各軍之啟牘來人業已照單分送惟普軍則敝處派人送
去也其捐項各軍自必迅速彙解來楚無疑矣至在安慶攻剿
各營謹如來教行之俟捐齊後卽由敝處彙解長沙也此間近
況如常惟酷暑之候驟得大雨一洗滌之如服清涼散頗快人
意耳

復劉印渠中丞

月前兩肅蕪函計登記室頃奉五月初七日惠書荷獎注之殷
肫仰情深於舊雨披函三復且感且慙承示各處軍情謹悉一

一石逆爲土練屢敗其勢漸窮然此逆不除終足爲慮近得南
中來函稱聞有窺伺楚境之說現已處處設防想可有備無患
耳家兄於五月二十一日至黃石磯與楊彭諸君面商一切弟
亦先期往候至二十七日赴東流在建德小住數日刻下計抵
祁門矣湖南新募之師左季高業已成軍劉霞仙尙未決志出
山家兄部下究少獨當一面之才季公來皖大約必需七八月
之交始可達家兄大營此外奏調如凱章等軍亦須秋初始可
至皖南耳弟駐攻安慶碌碌未有所樹立克復之期尙是窮年
莫殫累世莫究局面而大股援賊秋間必到尙須設法禦之日
來傳集鄉民收獲附郭之稻田而出大隊以屏蔽之免資寇糧

究竟城內之糧亦充足不可以數計現在於城東菱湖東北趕掘長濠城逆雖屢出護壘施放鎗礮然百計誘之而賊總負隅不敢遠出是以未能痛剿也西粵之民重見天日幸得福星照耀從此慶再生矣老兄新政定多可觀便中尙祈示悉以慰鄙人拳拳之念

與王孝鳳

弟自去冬旋里今春料理先叔葬事後四月初抵安慶營次卽率各營步步進紮現已將合長圍開長濠而使城賊之接濟盡斷惟冒暑版築勇丁殊形勞瘁病者纍纍耳家兄已抵祁門約俟奏調咨調及新募各軍到齊卽分三路進搗時艱日亟重荷

驟肩辦理亦殊不易所幸羣雄襄助將來大局或有起色耳
知關肫注並以奉聞

復彭雪琴

頃得十二夜還示敬悉一切掩旗登舟之說卽當轉告朱唐二
君寄咏公函已交步撥飛遞當不誤也蔡遊戎來云城賊於隄
埂上添修一壘又將新河隄埂開挖意圖洩菱湖之水使飛划
不能久泊據蔡遊戎之意欲請麾下派戈船至塔邊轟之以阻
其挖隄之舉不知可行否鄙意無成見也如果水洩而涸定仍
將飛划招回石門湖老營耳

復嚴渭春

頃奉還雲敬悉一是舍弟謬逐軍旃辱承獎注彌增慚汗家兄
定於十五日由松滋啟行此次猝膺艱鉅生面另開籌兵籌餉
多賴諸君贊襄之力感何如之弟駐攻安慶本乏片長昨以此
間抽調朱唐之營委以統領重寄益虞綆短祇切水競尙以勝
算時頒俾執戟行間者得奉爲金科玉律是所厚幸耳皖賊一
意堅守其東門三壘中亘長隄右傍湖汊伏礮船坐船於其中
以爲倚護使我軍不能進逼弟與雪琴兄函商欲破此壘非先
奪其船隻不可欲奪船隻非舁小礮船出其不意以擊之不可
遂於十一日傍晚擡水師飛划十餘號先伏濠內十二早黎明
擡入菱湖陸師出大隊助之適乘不備焚賊船十餘號奪礮船

四號斃賊約二百餘人生擒十數人正法自樅陽克復其通東一面楊彭均派有划船扼要駐紮城中之接濟可悉斷矣弟遵官胡兩帥慎防援賊之意暫不合東門之圍惟日遣偵探分踏路徑以爲痛剿狗逆之計耳

與文式巖方伯

初八早耑勇賁呈一械因敝營委員回湘添募壯勇二千所需鎗械棚帳及募勇之費來皖之資均求閣下籌備惠給計登台鑒連日東風甚勁彭毓橘張詩日等於月杪當可抵長沙其所需一切祈閣下寬爲籌備陸續發給俾該員等得以一意召募成軍迅速來皖則感激之忱非可言喻矣皖賊自樅陽克後接

濟已斷十二早我軍舁飛划十餘號入菱湖以奪東門護壘之賊船陸師出大隊助之適乘不備焚賊船十餘號奪其四號斃賊約二百餘人生擒十餘人現在東門之圍尚未遽合以此間爲犄逆老巢其援必速惟秣馬厲兵多畱餘力以待之耳知關肫注用以布聞

與王枚村觀察

吉州別後倏忽數年久未通尺素問訊起居知高臥東山之故人雅不欲以時俗之論入耳然鄙懷企想則未嘗一日不縈迴也弟謬逐軍旂一事無成徒負良朋期望之意每念及之愧悚莫名前月希庵兄惠臨敝營相與論及梓鄉之胸懷將略者莫

不共欽老兄爲傑出又極知清恙早痊羣思擁戴爲帥以拯時
勢之艱虞而家長公旋奉兩江總督之命猝膺重寄生面另
開亟須將伯之助冀挽旣倒之狂瀾而共夷東南之大難是以
一二同志之士如閣下與霞仙諸君子均請出山相助霞翁聞
已與高叟各募五旅之衆聖人之意將以蜀事屬高高若西
征霞必東來矣辰下台旆計已命駕當國步迍邐之際正賢
豪佐命之秋吾知旄節舊臣其必投袂而奮然以興也上報

國恩而下慰民望赴友朋之急靖東鄙之亂在此一行賢昆仲
其有意乎盼切望切長公於二十一日至黃石磯二十七日赴
祁門弟駐軍安慶靡善堪陳西北之長濠已成東門尙未合圍

惟多畱餘力以防援賊上犯耳

復劉霞仙

頃得五月二十一早還槭敬悉一切老伯大人之佳城必大有可觀他日歸來時當一登覽以擴眼界也崇封旣卜閣下之孝思已盡矣當時勢艱虞之際正賢才佐命之秋竊謂老兄宜命駕過征上以報國家養士之恩卽以慰老伯教忠之意乃來示云高臥不出殊非所以慰朝野具瞻之道昨讀咏公敬舉賢才一疏台銜已入薦章計敦迫之書早達珂里想已命駕出山尙冀速募勁旅數千飛帆東下以拯東南之亂而赴友朋之急是所盼禱家兄於十五日從宿松啟行二十一日抵黃石磯

與厚庵雪琴會商一切弟與季亦與焉二十七日赴東流日內計抵祁門矣弟謬肩攻皖之寄彌切水競所幸大旆東來叨教之日甚長耳皖賊堅守不出我軍惟深溝高壘以防援逆日來派隊掘菱湖東北長濠並護鄉民割附郭之禾免資寇糧城逆屢出萬餘人互施鎗礮而已未開大仗也知念並附及之

與嚴渭春

初二日肅布一檄諒塵英鑒昨奉大咨承惠安慶全軍藿香丸百斤通靈如意丹共百瓶已如數解到比照各營人數分給矣當溽暑薰騰之候蒙大君子軫念行間凡屬執戟荷戈之士莫不挾纊臚歡同拜刀圭之賜如存餘尙多更祈倍數賜之爲感

皖賊堅守如常前以早稻新熟傳集鄉民出濠收獲免資寇糧我軍出大隊以屏蔽之其菱湖東北長濠亦起緊掘挖城逆雖屢出萬餘人扼路施放鎗礮然緊護賊壘不敢遠出是以未能痛剿耳昨據行營糧台稟稱安慶各軍鄂省自六月以後將應解霆禮兩營之餉歸併協餉均解北岸有餘則撥解南岸惟鄂省四月以前之餉已到五月尚未蒙惠解現在各營請領紛紛支絀異常轉懇函催等語伏思尊處現值援軍四出之時自有應接不暇之勢惟安慶一軍正值攻剿喫緊之際需餉甚急尚望源源惠解以蘇涸轍則感荷無既矣

與胡宮保

頃得下游探報狗逆有不日上援之信未審尊處近日所探賊情相符否此間已遣人再往下游偵探如得確耗卽當奉聞也尊處必有確實探報祈隨時惠示爲禱厚庵雪琴希庵三公均於昨日至敝營因天雨尙未察看附城一帶形勢可否合圍之處俟三君子勘定地勢商量後再行奉告耳

與楊厚庵

台旌送希兄至洪家舖此時想已回營矣敝營連日派隊刈捨經渡對岸蘆柴因浮水面上三四尺許殊難下手僅就其高處刈之一時尙難斬刈成行約浮橋搭成水勢稍落乃可盡伐蘆葦始可移營紮韋家店一帶也其安慶對岸咏公函來亦宜急

自見墓公書才一
添陸師駐紮與戈船梭巡庶奸民之接濟無從透入家兄復函
稱曾德勝在東流係防池州之路未便調來囑弟函請麾下卽
調新後營周遊擊且來駐紮容日卽設法添營來紮云云竊思
對岸地方極係城中接濟與文報往還之要路祈麾下卽日札
飭周遊戎一營朝發夕至爲感

與彭雪琴

承飭嚮後營辦船搭浮橋已來二十二隻承惠礮子一千五百
顆明早卽可到車經度感何可言兩馬事祈門回信作何辦法
誠恐消息旣漏駟馬難追也頃接劉祝廷來函以史久立前在
湖口殉難後現在家徒壁立糊口維艱其應得卹銀七百餘兩

已經蕭輔臣觀察函寄二百金其餘五百餘金囑弟轉懇麾下作速籌給云云弟因此項銀兩是否由藩庫領取或尊處暫爲代發計老兄垂憐舊部必有以處之矣因祝廷有顧全史家苗裔之意囑弟說項弟是以代爲轉懇是否可行仍聽鴻裁施行可也

與鮑春霆

初二日肅復一函計登台覽今日十里舖一帶之賊壘均空壁向關外而去惟菱湖邊中空之十餘賊壘仍穩踞未動頃據逃賊供稱皆云狗酋昨夜傳令畱菱湖邊中空一段之賊壘在此穩守以濟城糧狗酋已親帶大隊由練潭高河舖往老梅樹街

與多軍挑戰等語並畱一小枝在關上關外牽制弟軍不出濠
弟觀石塘湖畔之村房今下午炊煙果大少則狗酋已分人往
挂車河無疑矣弟思狗酋詭譎異常知雄師來援勢難抵敵故
親自分大股以先竄桐城與黃文金楊六麻子各賊首上下並
進以圖擾犯多軍乃意中事鄙意狗酋既避竄乘虛請麾下到
石碑時相機而行如果該路賊太多則求大軍先助多公則爲
益於北岸者甚大俟同力前後夾擊將狗逆此股殄殲然後再
來打集賢關及菱湖邊中空一段亦不爲遲弟尙能久守以待
雄師之來援也惟狗酋業已見機先動此次屠狗之願未遂而
城糧又已充裕弟心焦灼憤懣之至所有一切進兵機宜惟麾

下洞悉賊情相機圖之勿以先援弟爲念也

復李少泉

頃奉二十九日手函敬悉壹是承囑糧台籌解子藥並令局員收存銀錢以備提用其垂注敝軍之心有加無已感甚感甚仙屏避亂吳城終非樂土未審果如老兄所指攜家而來東流否念念此間穩守濠壘菱湖水師於昨日奪賊船數號斃賊頗多方冀多鮑來援即可收聚殲之效乃狗酋詭譎異常於初四日率大股向練潭桐城一路而去惟中空一段之偽壘十餘座仍踞守如故據投誠賊供狗酋知援軍將至故分大股與多軍搦戰幸禮帥預爲準備當能破此悍逆鮑軍於初三日渡江今日

可抵石牌也

復多理堂都護

今早肅復一函後旋奉初六日午刻惠書敬悉種種狗酋率黨在海螺山冷水舖一帶蹲伏似乎屬實又狗逆詭譎異常是否又隱藏別處惟老兄偵探甚確必早能扼賊所趨重之地相機剿辦矣弟隨時據所探情形函告左右不過聊備老兄採擇耳至韋軍已於初五日仍回樅陽老營是以未令其乘隙出擊也弟接兄信後卽略出馬步百餘人至關外一探拿獲長髮供稱在關外者今早五鼓已出隊往大橋頭之左右探官軍進兵情形其意兼擄掠糧草云云弟看實關外祇四賊壘其餘皆往館

子內也

復鮑春霆

今早肅復一函計先達台覽頃奉初六日亥刻惠書敬悉貴軍於本日進紮洪家鋪明日可抵大橋頭快慰無似弟於今日午刻略出馬步二百餘人至集賢關上探看賊勢該逆從關外分兩路蜂擁而來約萬餘人我軍馬步亦分爲兩路且戰且收直誘至後濠邊而後派數哨人回擊之殺賊數十人奪獲擡鎗刀鎗三十餘件我軍亦傷亡數人申刻仍收隊入濠查關外之賊紮壘四座其餘皆靠大龍山一帶住民房內狗酋是否往海螺山一帶想貴軍必能偵探確實也

與多理堂都護

昨日午刻肅復一函後仍略出馬步二百餘人至關上察看查
狗逆實在關外之大小龍山及海螺山一帶民房內盤踞據各
路探報及弟所日睹情形俱屬符合連日晴明貴軍旣已步步
進紮鮑軍於初八日抵大橋頭其應如何剿辦之法想我公必
與鮑成兩軍函商謀定後戰矣弟意進大橋頭之軍宜歇住一
天以節軍士之勞一則可以審視賊情一則可以面商機宜預
扼狗酋逃竄之路至初十一仍開大仗則狗逆更不能漏網
矣又宜防狗酋敗入關內走大小龍灣鮑家衝羅家嶺而潛出
馬踏石也馬踏石一路想老兄必已設伏兵以待之矣此皆愚

昧之見是否有當均備老兄採擇所恕之

復李少泉

頃奉三月二十七日手書承垂注殷殷心感曷既前蒙閣下與
黼翁商撥之三千串已於今日據丁委員解到惟敝軍需餉甚
鉅當萬分艱難之時不得不仰求於總糧台諸公多爲惠解以
濟燃眉之急茲特咨請張方伯與黼翁設法援手卽日委解錢
二萬串銀二萬兩以安勇心而支危局將來卽作爲南岸協濟
北岸糧台之款亦無不可無厭之求想諸公必爲鑒諒尙希老
兄極力婉懇以應目前之急需以全一萬六千餘人之性命是
所感禱狗酋分股屯住菱湖邊中空一段之十餘僞壘自率大

股分紮關外及大小龍山一帶民房內弟於昨日率馬步二百餘名至關上察看賊勢該逆卽蜂擁而來約萬餘人我軍馬步分兩路收至濠根誘該逆逼近而後出數哨以回擊之斬獲頗多該逆遂狂奔而去矣鮑軍於近日可抵大橋頭計與多成兩軍會合日內必有惡戰如擒殺狗酋則大局之幸未審果克如願否

復多理堂都護

昨晚奉初七日亥刻惠書敬悉老兄於昨早至大橋頭與鮑成二公面商一切日內計有大戰矣貴軍從馬踏石而進正與該逆之大小龍山一路相對處處扼截狗酋必不能漏網頃接李與

吾來信初六日有賊竄至練潭經水師擊退生擒四十餘名內有供天福一名云云承示尊處如先遣馬隊告弟必派彭巡捕及親書之信爲憑以杜假冒仰見老兄之智慮周密感佩之至弟惟穩守嚴防以聽捷音斷不輕易出濠耳

復多理堂都護

頃奉初九未刻戌刻惠函敬悉貴軍於今日移紮磨山如明日無雨即可開仗弟當謹遵訓示俟大隊至關外弟卽預派隊出濠卡四五里擺列以作牽制之兵而守前濠之弁勇則仍守濠不出耳鮑成二公處已飛函馳告請照老兄來信辦理想必就近與老兄函商定妥行事也鄙意賊勢盡趨大小龍山一路則

馬踏石唐家橋一帶皆仗大力兼顧至於進赤岡嶺一帶與進關上一帶似宜以鮑成兩軍穩進猛打而以貴軍多留兵力以防該逆趨出之路兄意以爲何如總之相機勦辦不可預爲保法鮑成二公皆閱歷萬戰必足以仰體老兄布置耳

復許仙屏

連奉四次惠書誦悉種種此間多鮑成各軍定議於十一日會勦狗酋卽於初十日由馬踏石竄往桐城多軍探知卽跟蹤追勦殺賊約五六百人弟於十一日率各營猛攻菱湖邊之賊壘一次因牆堅礮密未能得手鮑軍於是日攻關外賊壘亦屢撲不動我軍傷亡甚多弟與鮑公會商賊壘旣堅不可破惟圍之

一法使之糧盡自斃第恐他處有警而鮑軍不能久留狗賊又
颺忽而至則又成曠日持久之局耳如有捷音卽飛速奉告以
慰盡念承示辦捐一節均可照行請閣下與願捐之三君商定
各繳銀四千兩就近交柳南解來敝處立刻詳請長公附近日
保案以知縣不論雙單月遇缺卽選歸入戰功不作捐項也但
營中需餉甚急如願捐者請閣下囑令速繳銀兩應如何保獎
弟均一力承應斷不食言伏乞閣下幫爲辦到至懇至懇前託
代購之書當風鶴頻驚之時儘可作爲緩圖閣下猶拳拳在念
可見大君子一諾不忘也

與鮑春霆

未刻肅布一函後旋據確探稟稱關外四壘實數有賊三千餘人乃外來之援賊非城內調出之賊也城中惟派賊酋施永通在內主持一切狗酋竄退之時所有各賊館攜存之糧均送存壘內目下儘可支持又將各賊館所用火藥及洋鎗抬小鎗均存爲守壘之用惟大礮則祇五座以堅守此四壘而已狗酋臨去時與各賊目密約此次竄往桐城糾合偽璋王玕王及胡黃古賴四逆先犯挂車河營壘如不能驚動卽約攻潛山太湖如皆不動則於半月內外仍回竄安慶爲關外四壘解圍兼攻安慶官軍等語又確探云中空一段之九壘亦有賊實數四千餘人城中調出者不甚多亦有數千是狗酋帶來之賊畱在此間

等語伏思關外賊壘旣米糧子藥充足斷非一時所能攻克弟
前函所請貴軍移營圍賊壘之說斷不可遽行也應如麾下原
議仍於大橋頭駐紮老營深溝高壘以觀狗酋之變動而後相
機剿辦究爲穩着或每日出隊以牽制之斷其接濟亦妙如能
於狗酋未到之先每營分六成隊伍每隊帶一帳棚相地勢紮
草梁子十餘座以圍此賊壘使之驚而夜遁則追殺更妙矣一
探聞有大股來則仍移於老營內蓄銳待戰則萬穩取勝之道
也如或狗酋趨犯太湖潛山貴軍亦可抽動赴援卽或挂車河
須助剿亦可拔營往助多公合擊賊之大股一聞宮保之信卽
可將草梁子隊伍收回大橋頭拔營雕剿各處毫無窒礙實亦

萬全之策也如紮草營將此四壘圍數天切不可再攻然賊必有變動現出或於其逃退時將此股吞滅則狗酋之毒計便破矣鄙見如是是否可行仍希卓裁審量施行弟已將此賊情函告宮保多公請其嚴防挂車河潛山太湖三處矣至此間目前有貴軍在關外扼駐則後濠鬆勁弟擬明日天霽卽移二千餘人紮於偽壘之後深溝高壘開挖長濠庶賊不能通關外之氣而接濟可斷如援賊復來我軍惟穩守營壘以鎗礮收拾賊之精銳學該逆善守之法賊亦無如我何矣如貴軍援應他處慮此間兵力單薄弟當與厚帥商定將在樅陽之敝部仁字營五百人調回並留朱雲巖兄湘前營在此助守一月以待雄師從

後路打來則事體更穩而制賊亦中肯也麾下如以此論爲然請與成軍老營駐大橋頭相地紮圍賊壘看賊十日內如何情形庶毫不礙於將來抽動雄師雕勦耳弟已函請家兄來鹽河口以便面商一切想必一二日內可到麾下如可拋散一天乞由獅子口坐船至鹽河邊來弟處細商以便指示一切俾弟有所遵循是所感禱又狗酋率大股竄出無論半月復來與不復來無論往挂車河及潛山太湖與否十日之內必大有動作倘太湖有警則雄師萬不能不速往救援尙祈飛速整治受傷之人令貴部各弁勇趕快整好傷痕則北岸南岸皆依麾下威名實億萬蒼生之福也

復張凱章方伯

頃奉初十夜惠書敬承壹是休甯有雄師砥柱屹若長城高叟自樂平大捷威望益隆然左顧右盼亦頗疲於奔命矣此間自援賊入關相持二十日以待多鮑成三軍夾擊乃初十日大霧狗酋向桐城遁去多公率馬步追之及伏兵截殺之賊約二千餘人頗快人意其圍踞關內中空賊壘十三座關外賊壘四座皆死守不動十一日敝軍與鮑軍均猛攻一次都未得手遂變計圍之弟於十三日移二千六百餘人分八壘駐紮將關內中空之賊壘一併圍住使與關外之賊聲氣不通接濟盡斷當有瓜熟蒂落之候如狗酋再至惟穩守以鎗礮擊之賊亦無如我

何耳鮑成仍紮關外相狗逆之所趨向以爲勦辦如南岸有警亦可抽調不膠滯一隅也

與楊厚庵

昨奉復函以菱湖所紮新後營一哨不宜移動具微關注之至已遵示辦理矣頃接多公來函於十五日破黃家鋪一帶之賊館賊壘殺賊極多有此大捷狗逆必難卽振此間可趕挖夾濠從容部署矣惟據武明良來稟十六日辰刻有艇船一隻懸挂紅旗其載約有二千餘石至城下停泊今辰仍開下去重載而來輕載而回或洋人或奸細與賊轉運均未可料等語弟思艇船係中國之船焉得與該逆運送接濟此事殊爲可慮請麾下

查明如果係艇船能否杜禁之處祈卓裁辦理又據武營官稟稱池州上竄之賊內有薙髮百餘人混充百姓在八都山內湖擄漁划十隻欲潛渡建德東流云云務請軍門卽飭水師各營哨嚴密查拏是所感禱

復趙玉班廉訪

頃奉二十四夜惠函敬承壹是前竄靖州之賊向綏通而去經老兄與署中丞商調一軍以截擊之必能阻入江之路而道州以東亦可免其蹂躪矣此間穩守兼旬幸無一隙之疎懈狗酋率大股出關屯聚於大小龍山一帶其踞關內菱湖邊中空一段之十餘僞壘則相持如故日夜窺伺弟於初七日率馬步百

餘人至關上察看關外之賊勢該逆卽蜂擁而來約萬餘人我軍且戰且收誘至濠根然後出數哨擊之斬獲頗多賊遂狂奔而去矣頃接水師來函狗酋於初六日派大股竄至練潭意圖搭浮橋以通桐城之氣比經戰船擊退擒斬亦多並獲其供天福一名鮑軍於昨日抵大橋頭多公與成武臣兄亦分道並進均至大橋頭面商一切日內計有惡戰矣

與許仙屏

前肅寸箋並長公囑寄一函計達台覽聞瑞州之變寇氛擾及珂鄉卽深以爲念未審遷避何所頃得柳南來書知尊府已暫寓吳城當風鶴震驚之餘其顛沛情形亦可想見惟祝侍闈晏

福履祉臻綏是則私心所切禱者耳聞僞忠王一股不甚精悍惜江中無勁旅足以了之長公所調劉靖臣一軍未知何時可到次青兄援浙之師曰內計可由袁州進剿如能掃蕩此股免久踞蔓延之患則不僅爲老兄桑梓之福耳四眼狗於前月十八日悉銳而來意圖與城賊夾撲解我皖圍幸穩守已二十餘日無一隙之懈曰內計有惡戰如能擒殺狗酋乃大局之幸未審果克如願以償否一有捷音卽當飛報尊聽耳

與胡宮保

昨日得多鮑來函定於今日開仗囑敝軍出隊牽制是以於今早派守後濠之隊伍均出濠七八里排列午刻又得多鮑來函

知狗酋於昨日由馬踏石逸去其在大小龍山所住各賊館均係束草爲人樹以旗幟使我軍不知其去也惟關外四壘則穩踞未動幸多公跟蹤追剿殺賊數百人遂率馬步往挂車河老營照料以防狗酋糾合桐城之賊飛速回竄也國荃得狗酋逃竄之信與各營官計議不得不將菱湖邊空段之十餘僞壘猛攻一次冀斷城賊之接濟卽或狗逆再來亦可免其通氣乃令各營分道進攻已將各僞壘之木城花籬芭拔之殆盡軍士多有緣壘而登者該逆以洋鎗洋礮排比轟擊子如密雨我軍陣亡及受傷約三百餘人終不能入是以於日晡時仍令收隊聞關外賊壘亦未打破何攻堅之難也國荃擬請鮑公至關內面

商一切或請其紮數營於僞壘之後使壘賊逼而入城容俟面定機宜再行馳告耳

與胡宮保

昨夜肅泐稟函計呈慈覽國荃於今早令西北各營仍出隊後濠至集賢關外層層擺列而自率馬隊與鮑公會晤未刻因大雨如注仍收隊入濠詢悉昨日鮑軍攻關外四壘適厚帥率新後營而至極贊鮑軍之勇欲觀其一戰是以各將弁皆爭先摩壘奮不顧身仰攻數時之久因牆堅礮密未能得手而傷者將近八九百人亡者將近百人內有蘇姓營官一員卽受傷者亦有營官二員哨官十餘員可謂竭力苦攻矣鮑公以此次攻堅

損傷太多深愧無以副我公平昔訓示不攻堅之意不敢遽報
祈曲爲諒之竊思狗酋遁去所遺關外之四賊壘與中空之九
賊壘亦不得不猛攻一次至利鈍則有天定想我公必能知鮑
公與國荃二人昨日之苦心也鮑公云昨日之傷亡甚多而銳
氣如常卽狗酋再至其力亦足剿之伏求我公不必繫念國荃
與鮑公籌商賊壘旣牢不可破但求他處無警鮑軍則圍關外
之四壘以制續來之援賊國荃亦派守後濠之營出濠紮壘將
菱湖邊空段之賊壘一并圍住以杜此後無窮之接濟使關內
外之賊聲氣不通久之乃可有克復之望如月內可逼其入城
則滿盤皆活子矣如有一軍在關外打續來之援賊則守濠者

之力量亦尙可如此辦法也總之千錯萬錯皆是國荃一人之錯今則愧悔莫及仍求大力顧全爲感又據百姓云關外之四壘與中空九壘之賊多係城內調出守路者狗酋親率大股皆逸出矣將來爲患亦甚長也又初九十之大霧咫尺不見皆有天意今而知長公前日之論爲有閱歷也

復多理堂都護

昨肅兩函詳布圍剿情形計呈英盼頃奉十一日戌刻惠書知狗酋雖竄往桐城經大軍追剿及截殺之賊約二千餘人殊爲快意弟於今日移二千六百人紮六營於僞壘之後勢若貫珠牆壘已修砌完固惟尙須十日修濠總期一力穩守以舒老兄

盡念老兄公忠體國弟所欽佩又閱歷萬戰布置千里皆有勝算尙祈時賜訓示爲幸

復多理堂都護

今日辰刻肅泐一函計登台覽旋奉十三日惠書敬承壹是查關外賊館均已搜剿淨盡餘賊四千餘人皆歸併赤岡嶺壘內鮑成兩軍擬明日進圍當照來示擇高阜之地修礮台以轟擊之或可驚令自潰也此間中空之賊壘及賊修礮台經弟諦視實共有十三座據逃賊供稱不過五千人內有四千餘人係狗酋一股畱在此者現經敝軍移二千六百人分八壘駐紮將中空一段之賊一併圍住賊之接濟盡斷矣目下趕緊深溝高壘

仍加修中間攢濠二道爲送接濟之路專議守而不言戰卽援賊復來亦可自固又紮二小壘於湖邊又紮二小壘於蕭家壩二堤上均於五六日內成功並遵兄諭以大礮對賊壘轟擊矣據賊供狗回救關外關內之賊壘必速則鮑公與兄有大仗可開也捷音在卽慶何如之至於西北二面兵分力單則已調湘前營六百人仁字營五百人以厚兵力矣